

- **Da li je Ministarstvo pravde BiH u proteklih godinu dana provodilo aktivnosti na izmjenama i dopunama zakonske regulative, ali i pokretanju kampanje, za suzbijanje govora mržnje na internetu?**

Ministarstvo pravde BiH je uspostavilo Radnu skupinu za iznalaženje adekvatnih rješenja kojim će se otkloniti uočeni nedostaci i unaprijediti važeće odredbe Kaznenog zakona Bosne i Hercegovine i Zakona o kaznenom postupku Bosne i Hercegovine, koje će Radna skupina pripremiti u vidu nacrtu zakona o izmjenama i dopunama važećih propisa, te s ciljem međusobnog usklađivanja kaznenog zakonodavstva u Bosni i Hercegovini, inicirati i eventualne izmjene i dopune zakona iz kaznene oblasti na razini entiteta i Brčko distrikta. U narednom razdoblju u okviru rada navedene radne skupine, pored drugih inicijativa, razmotrit će se i uvođenje govora mržnje na internetu u Kazneni zakon BiH.

- **Da li je Ministarstvo pravde BiH u proteklih godinu dana provodilo aktivnosti na izmjenama i dopunama zakonske regulative za kažnjavanje nasilja na sportskim terenima?**

Zakonska regulativa vezana za nasilje na sportskim terenima nije u nadležnosti Ministarstva pravde Bosne i Hercegovine. Odgovor na ovo pitanje trebaju dati nadležna entitetska tijela.

- **Da li je Ministarstvo pravde BiH u proteklih godinu dana provodilo aktivnosti na izmjenama Krivičnog zakona i Zakona o krivičnom postupku BiH?**

Ministarstvo pravde BiH je uspostavilo Radnu skupinu za iznalaženje adekvatnih rješenja kojim će se otkloniti uočeni nedostaci i unaprijediti važeće odredbe Kaznenog zakona Bosne i Hercegovine i Zakona o kaznenom postupku Bosne i Hercegovine, koje će Radna skupina pripremiti u vidu nacrtu zakona o izmjenama i dopunama važećih propisa, te s ciljem međusobnog usklađivanja kaznenog zakonodavstva u Bosni i Hercegovini, inicirati i eventualne izmjene i dopune zakona iz kaznene oblasti na razini entiteta i Brčko distrikta. Radna skupina je u protekloj godini održala niz sastanaka na kojima su razmotrene odredbe Zakona o kaznenom postupku BiH te je pripremljen materijal koji će biti u predstojećem razdoblju dostavljen na suglasnost svim članovima radne skupine, a potom u daljnju proceduru. U predstojećem vremenu radna skupina će nastaviti rad na razmatranju inicijativa koje su dostavljene, a vezane su za rad na Kaznenom zakon BiH.

- **U kojoj su fazi Strategija za reformu sektora pravde u BiH i Akcioni plan sa pregledom pokazatelja za period 2023.-2027. godine?**

Strategija za reformu sektora pravde u BiH i Akcioni plan s pregledom pokazatelja za razdoblje 2023.-2027. godine, dostavljena je Vijeću ministara BiH, na razmatranje i usvajanje. Konstruktivni komentari iz Republike Srpske su dijelom usvojeni i uključeni u tekst Strategije, a

ostale komentare pokušavamo usuglasiti. Vjerujemo kako će na idućoj sjednici Vijeća ministara BiH ova Strategija biti razmatrana.

- **Ukoliko je Ministarstvo pravde BiH u proteklih godinu dana provodilo aktivnosti na izmjenama i dopunama zakonske regulative u oblasti pravosuđa, da li su u sklopu navedenih izmjena razmatrane izmjene odredbi koje se tiču sljedećih pitanja:**
 - osiguranje ujednačenosti u procesuiranju i kažnjavanju za pojedina djela
 - razdvajanje VSTV-a na dva odvojena organa
 - poboljšanje načina izbora sudija i tužilaca
 - podjela VSTV-a na državno i entitetsko
 - uvođenje kriterija za provjeru i evaluaciju rada tužilaštava
 - preciziranje formulacija disciplinskih prekršaja i postupka utvrđivanja disciplinske odgovornosti sudija i tužilaca
 - kapacitiranje tužilaca i uspostava subordinacije s policijom?

Rješenjem ministra pravde BiH broj: 06-05-7862/22 od 9.2.2023. godine, uspostavljena je Radna skupina za pripremu Nacrta zakona o Visokom sudbenom i tužiteljskom vijeću Bosne i Hercegovine. Radna skupina je sastavljena od predstavnika: Ministarstva pravde BiH, VSTV-a BiH, Direkcije za europske integracije, entitetskih ministarstava pravde i Pravosudne komisije Brčko Distrikta.

Radna skupina je održala četiri dvodnevna i jedan trodnevni sastanak te je usaglašen veliki broj odredbi nacrta novog zakona o VSTV-u, s tim da su za pojedine odredbe predložena različita rješenja te predstoji dalje usaglašavanje. Radna skupina razmatra sve pristigle sugestije, prijedloge i komentare na važeći Zakon o VSTV-u, a koje se tiču poboljšanja, unapređenja, noviteta, kao i usklađivanja s EU standardima ovoga zakona.

U tekst budućeg zakona su ugrađene odredbe iz Zakona o izmjenama i dopunama Zakona o VSTV-u koje je u rujnu 2023. godine usvojila Parlamentarna skupština BiH. Sljedeći sastanak radne skupine bit će održan krajem siječnja ove godine.